

আনন্দময়ী

BANGLADARSHAN.COM  
রজনীকান্ত সেন

# উৎসর্গ

সাহিত্যানুরাগিণী, 'বৈভাজিকা'-রচয়িত্রী,

বিদুষী শ্রীমতী ইন্দুপ্রভা চৌধুরাণী মহোদয়া,

বিপ্লোদ্ধরণব্রতাসু-

দূর হ'তে, স্নেহময়ী ভগিনীর মত,  
কেঁদেছিল করুণায় ও-কোমল প্রাণ,  
তাই বুঝি সাধিবারে দুঃস্থহিত-ব্রত,  
পাঠাইয়াছিলে, দেবি, করুণার দান।

মৃত্যুর কবল হ'তে নিয়েছিলে কাড়ি',  
অযাচিত সহায়তা করিয়া প্রেরণ;  
নতুবা যাইতে হ'ত, ধরাধাম ছাড়ি',  
একাকী, অজানা দেশে আঁধার, ভীষণ!

ধন্য তুমি, ধন্য ভ্রাতা শরৎ-কুমার!  
যাঁদের কৃপায় বেঁচে আছি এত দিন;  
ভুলিব না এ জীবনে করুণা তোমার,  
নিঃস্বার্থ, নীরব দান-ঘোষণা-বিহীন!

বিশীর্ণ, দুর্বল হস্তে, কম্পিত অক্ষরে  
রচেনি "আনন্দময়ী,"-শুধু মার নাম;  
যে করে ক'রেছ দান, ধর সেই করে,  
ধন্য হই, সিদ্ধ হোক দীন-মনস্কাম।

মেডিকেল কলেজ হাঁসপাতাল,

কটেজ ওয়ার্ড, কলিকাতা। কৃতজ্ঞ গ্রন্থকার

আষাঢ়, ১৩১৭ সাল।

# মাতৃ-স্তোত্র

জয় বিশ্ব-ধারিকে! তাপ-বারিকে!  
মোহ-হারিকে! লোক-তারিকে!  
গতি-বিধায়িকে! হে হর-নায়িকে!  
অভয়-দায়িকে মা!  
তুং হি তারিণী, অচল-বালিকে!  
নরক-বারিণী, অখিল-পালিকে!  
তুং হি গৌরী, চণ্ডি! কালিকে!  
ঐন্দ্রজালিকে মা!  
তুং হি শক্তি, অসুর-নাশিকে!  
তুং হি ভীমা, পাপ-শাসিকে!  
ঘোর-নাদিনী, অট্র-হাসিকে!  
রণবিলাসিকে মা!  
সৰ্ব-মূৰ্তি, সৰ্ব-ব্যাপিকে!  
চণ্ড ভৈরবী, ভূত-ভাবিকে!  
ভক্ত-আশ্রয়, পাপ-তাপিকে!  
মুক্তিপ্ৰাপিকে মা!

রাগিণী রাগবিজয়-তেওরা

# গিরি-মহিষী মেনকা

ধন্য মানি মেনকাকে;

ত্রিজগজ্জননী যারে

মা জেনে, মা ব'লে ডাকে।

ত্রিভুবন যার কোলে দোলে,

রাণী তারে করে কোলে,

চরাচর যার চরণ চুমে,

(রাণী) তার শিরে চুম্বে সোহাগে।

ব্রহ্মা, বিষ্ণু, মহেশ্বর যার

চরণ-ধূলো চায়;

(রাণী) মেয়ে ব'লে আশিষ-ছলে

দেয় চরণ তার মাথায়।

সুধাতুল্য প্রসাদ যাহার,

সুখে জগৎ করে আহার,

রাণী আহার যোগায় তাহার,

নিজ উচ্ছিষ্ট খাওয়ায় তাকে।

যার চরণে প্রণাম ক'রে

সিদ্ধ সর্ব্ব কাম;

(সেই) নিখিলের নমস্যা করেন

রাণীরে প্রণাম।

স্থাবর, জঙ্গম যার অধীনে,

রাণী দেয় তায় পুতুল কিনে;

স্নেহাত্মিকা ভক্তি বিনে,

এমন ক'রে কে পায় মাকে?

যারে ছেড়ে তিলান্দ, না

বাঁচে জীব-কূল;

মা ছেড়ে সে যাবে ব'লে,

BANGLADARSHAN.COM

কাঁদিয়া আকুল।

যার নামে ভবের মায়া কাটে,  
সে বিকিয়ে গেল মায়ার হাটে,—  
ভেবে দেখলে আজব বটে,  
মা বা কে, মেয়ে বা কে!

যার চরণে জ্ঞানের রাণী  
বাণী লন দীক্ষা,  
মেনকা সন্তান-জ্ঞানে,  
তারে দেয় শিক্ষা।

যে মা ত্রিভুবনের ভূষণ,  
রাণী তারে দেয় আভরণ,  
কান্ত কয়, যার যেমন সাধন,  
তার তেম্নি সিদ্ধি মিলে থাকে।

মধুকানের সুর-ঠেস্ কাওয়ালী

BANGLADARSHAN.COM

# গৌরীর আগমন-সংবাদ

(প্রতিবাসিনীর উক্তি)

গা তোল, গা তোল, গিরিরাণি!  
এনেছি, মা, শুভবাণী,  
দেখে এলাম পথে তোর ঈশানী।

রূপে কানন আলো ক'রে,  
ছেলে দু'টি কোলে ধ'রে,  
কিশোরী কেশরি-পরে,  
কোটি চন্দ্র নিন্দি পা দু'খানি।

শঙ্খ-সিন্দূরে শুধু শোভে শ্রীঅঙ্গ,  
অলঙ্কারে কাজ কি,—সে যে আলোক-তরঙ্গ!

রোদে কষ্ট হবে ব'লে,  
মাথার উপর জলদ চলে,  
শাখীরা সব শির দোলায়ে,  
ক'চ্ছে বাতাস, পল্লব কাছে আনি'।

পথের পাশে থরে থরে উঠছে ফুটে ফুল,  
(মায়ের) আগমনী-মঙ্গল-গানে,  
আকুল কোকিল-কুল।

যত সুমিষ্ট ফল ছিল গাছে,  
পড়ছে এসে পায়ের কাছে;  
“মা, মা,” ব'লে চরণতলে,  
লুটছে যত মুনি, ঋষি, জ্ঞানী।

ছুটে এলাম, রাণী মা গো, সুসংবাদ দিতে,  
মুছ নয়ন ধারা, ধৈর্য ধর, মা, চিতে।

কান্ত বলে, সুসংবাদে  
বিবশা মেনকা কাঁদে;

আনন্দের সেই পূত নীরে  
ধুয়ে যায় গো প্রাণের যত গ্লানি।

মধুকানের সুর-ঠেস্ কাওয়ালী

BANGLADARSHAN.COM

# নগর-সজ্জা

(হ্রস্ব-দীর্ঘ উচ্চারণ-ভেদে পাঠ্য ও গায়)

কনকোজ্জ্বল-জলদ-চুম্বি-

মণি-মন্দির মাঝে,

বীণ-মুরজে, পর-মঙ্গল

মধুর বাদ্য বাজে।

পেলব নব পল্লব-দলে,

পূর্ণ কুম্ভ পাবন জলে,

কদলীতরু-তোরণতলে

কুসুম-মাল্য সাজে।

গ্রথিত লক্ষ কুশল-সেতু,

গঠিত ইন্দ্রচাপ-সেতু;

লজ্জিত শশী, লক্ষ দীপ

সজ্জিত প্রতি সাঁঝে।

মাতৃ-দরশ-হরষ-গান,

আকুল শত সরস প্রাণ,

“মঙ্গলময়ি! জগৎ-জননি!

আয় মা!” বলি’ নাচেরে!

কহিছে কান্ত মধুপিয়াসী,

সার্থক গিরিনগর-বাসী ;

জয়, জয়, গিরি-মহিষী জয়!

জয়, জয়, গিরিরাজেরে!

কীর্তন ভাঙ্গা সুর-জলদ একতলা

BANGLADARSHAN.COM

# নগর-বর্ণন

(হ্রস্ব-দীর্ঘ উচ্চারণ-ভেদে পাঠ্য ও গেয়)

প্লাবিত গিরিরাজ-নগর,  
কি পুলক-মকরন্দে;  
জলদ টুটিল, জলজ ফুটিল,  
ভ্রমর ছুটিল গন্ধে।

ঝর ঝর ঝরে শত নির্ঝর  
শীতল-জল-বাহী;  
পরভূত-কুল আকুল, সুখে  
জননী-গুণ গাহি'।

বহিল স্নিগ্ধ মলয় মন্দ,  
সিঞ্চি' অমৃত দেহে;  
বিগত সকল রোগ, শোক,  
হরষিত প্রতি গেহে।

দীন-ভবন, তূর্ণ হইল  
পূর্ণ, রজত-হেমে;  
দ্বেষ-রহিত চিত্ত হইল  
পূর্ণ, জগৎ-প্রেমে।

ভোজন, কত পান, দান,  
গীত, বাদ্য, নৃত্য;  
মুখরিত অবিরাম নগর,-  
উৎসব নব, নিত্য।

বঞ্চিত সুখে, কান্ত অধম,  
প্রান্তর-তল-বাসী;  
(কবে) সিদ্ধি-শরৎ উদিবে, মিলিবে  
চরণ, কলুষ-নাশী।

# গৌরীর নগর-প্রবেশ

কে দেখবি ছুটে আয়,  
আজ, গিরি-ভবন আনন্দের তরঙ্গে ভেসে যায়!

ঐ “মা এল, মা এল,” ব’লে,  
কেমন ব্যগ্র কোলাহলে,  
উঠি-পড়ি ক’রে সবাই আগে দেখতে চায়।

নিষ্কলঙ্ক চাঁদের মেলা  
শ্রীপদনখে ক’চ্ছে খেলা,  
(একবার) ঐ চরণে নয়ন দিয়ে সাধ্য কার ফিরায়?

কি উন্মুক্ত শোভার সদন,  
ফুল্ল অমল কমল বদন,  
সিদ্ধি, শৌর্য, সোণার ছেলে অভয় কোলে ভায়।

কান্ত কয়, ভাই নগরবাসি!  
তোদের সপ্তমীতে পৌর্ণমাসী,

দশমীতে অমাবস্যা, তোদের পঞ্জিকায়।

# উমাকর্তৃক রাণীর পদ-বন্দন

(রাণীর উক্তি)

আয়, মা, কোলে আয়,

অঞ্চলের নিধি, আয়;

সারা বরষ পরে, মনে

প'ড়েছে কি দুখিনী মায়?

যে দিন থেকে হই, মা, আমি উমাহীন,

(আমি) জাগরণে যাপি নিশা, কাঁদিয়া কাটাই দিন,

অনশনে জীবনুত তনুক্ষীণ,

(শুধু) আরো একবার দেখে মরি,

(আমার) প্রাণ থাকে, মা, সেই আশায়।

মা ব'লে ডাকিতে আর, মা, আছে কে?

(আর) তোমার মতন মেয়ে ছেড়ে,

আমার মতন বাঁচে কে?

কোন্ বিধি এ নিষ্ঠুর বিধান ক'রেছে?

আমার সম্বৎসরের পোষা আশা

তিন দিনে ফুরায়ে যায়।

আমি একাদশী হ'তে দিন গণি গো,

আমায় অন্ধ ক'রে যাও, মা, আমার

দু'নয়নের মণি গো;

তুমি তিন দিনের তড়িৎ, ত্রিনয়নি গো!

কান্ত বলে, চতুর্থাতে

ঈশানি অশনি-প্রায়!

# রাণীর খেদ

সবই যায় তোর সাথে ধুয়ে-মুছে,  
শুধু স্মৃতিটুকু রহে, মা;  
আগে ভাবিতাম সহিবে না, হয়,  
মার প্রাণে এত সহে, মা!

লোকে কি বলিবে পাগল ভিন্ন?  
আমি খুঁজি তোর চরণ-চিহ্ন।  
ধন্য এ আঙ্গিনা, বুকে ক'রে, ওই  
রাঙ্গা-পদ-ধূলি বহে, মা।

তিন নয়নের হরিদ্রা-কাজল  
মুছে, তুলে রাখি দুকূল-অঞ্চল,  
দিনান্তে নিৰ্জ্জনে দেখি, আর কাঁদি,  
তারা কত কথা কহে, মা।  
সারাটি বরষ হইয়া বিকল  
এক হাতে মুছি নয়নের জল,  
অন্য হাতে করি সংসারের কাজ,  
তোর স্মৃতি কেন দহে, মা?

বল্ মা কল্যাণি! ও আনন্দময়ি!  
(আমি) তোরে পেয়ে কেন নিরানন্দে রই?  
কান্ত বলে, রাণি, আনন্দের দিনে,  
আঁখিজল ভাল নহে, মা।

# কার্তিক ও গণেশের আদর

(রাণীর উক্তি)

আয় গুহ, গণপতি, কোলে আয়!

দুই কোলে যে দু'ভাই নিব,

সে বল কি আর আছে গায়?

দূরের পথে আস্তে বদন শুকিয়েছে;

(যেন) দু'টি রাকায়ুষ্ণশী

মেঘের পাশে লুকিয়েছে;

তাতে পাহাড়ে পথ, সি হে আসা,

এ কষ্ট কি দেখা যায়?

আমি তো, মা, বছর বছর রথ পাঠাই;

কি ভেবে যে জামাই ভোলা

ফিরিয়ে দেয়, মা, ভাবি তাই;

আহা, এমন মেয়ে, এমন ছেলে,

এম্নি ক'রে কেউ পাঠায়?

ঐ ননীর গালে দু'টি চুমো খেতে দাও;

এখন মায়ের সাথে, আমার হাতে

পেট ভ'রে ক্ষীর-ননী খাও;

ওরে কৈলাসে যে খাবার কষ্ট,

তাই ভেবে মোর কান্না পায়।

গণেশ রে, তোর সরস্বতী কণ্ঠে থাক্,

কুমার রে, তোর বাহুর বলে

অসুর-শত্রু শঙ্কা পাক্;

কান্ত বলে, চিরজীবী

শিব হবে, মা, তোর কথায়।

(রাণীর উক্তি)

ঐ, উমা, তোর পোষা শুক তোরে  
“মা, মা,” ব’লে ডাকে;  
মূক হ’য়ে ছিল, নিজ হাতে কিছু  
খেতে দে, মা, পাখীটাকে।

ঐ যে, মা, তোর পোষা শিখীগুলি  
নাচিছে হরষে পেখম্টি তুলে’!  
তুই চ’লে গেলে, খোলে না কলাপ,  
নাচিয়া দেখাবে কাকে?

ঐ, উমা, তোর হরিণ, হংস  
নিয়েছিল মোর দুখের অংশ,  
(আজ) চরণের পাশে, ঘুরে ঘুরে আসে,  
(তোর) মুখ-পানে চেয়ে থাকে।

নব পল্লবে সাজে তরু-লতা,  
কোথায় পেয়েছে এত সজীবতা?  
থরে থরে ফুল, থোকা থোকা ফল,  
অবনত প্রতি শাখে।

পশু, পাখী, তরু আনন্দে মেতেছে,  
নূতন করিয়া সংসার পেতেছে,  
জ্ঞান নাই, তবু তোর কথা ওরা  
কি করিয়া মনে রাখে?

এ কাঙ্গাল কান্ত বলে, গিরিরাণি!  
যে দেখেছে মার চরণ দু’খানি,  
বিকিয়েছে পায়, ভুলিবে কি তায়?  
আর ভোলা যায় মাকে?

(রাণীর উক্তি)

সেই তমালের ডালে, মাধবী লতারে  
গেছিলি, মা, তুলে দিয়ে;  
সেই সুলগনে, যেন দু'জনার  
হ'য়েছিল, উমা, বিয়ে।

ঐ সে মাধবী, ঐ সে তমাল,  
জড়িয়ে, ঘুমায়ে ছিল এত কাল,  
প্রতিপদ হ'তে পল্লবে, ফুলে,  
কে রেখেছে সাজাইয়ে।

তোর নিজহাতে রোয়া চামেলী, বকুল,  
এত ছোট, তবু দিতেছে, মা, ফুল;  
ঐ তোর চাঁপা, ঐ সে যুথিকা  
ফুল-ডালি মাথে নিয়ে।

ফল, ফুল, কিছু ছিল না উদ্যানে,  
মনে হ'ত যেন মগ্ন তোর ধ্যানে,—  
তোর আগমনে, নব জাগরণে  
দিয়েছে, মা, জাগাইয়ে।

কান্ত বলে, রাণি, জেনে রাখ খাঁটি,—  
বিশ্বের জীবন-মরণের কাঠি  
ওরি হাতে থাকে,—কভু মেরে রাখে,  
কভু তোলে বাঁচাইয়ে।

পিলু—একাতালা

# রাণীর স্বপ্ন-কথা

স্বপ্নে পেতাম দেখা, হা কপালের লেখা!

এ মূর্তি, গৌরী, সে মূর্তি নয়;

এ যে, কি শান্ত, সুন্দর বিশ্ব-মনোহর

এ রূপে, সে রূপে, তুলনা কি হয়?

আকারে, আচারে, সব রকমে দুই,

(শুধু) বদন দেখে বুঝতাম, আমার উমা তুই,—

এ রূপ দেখে জগৎ দাঁড়ায় মুগ্ধ হ'য়ে,

সে রূপ দেখে পায়, মা, নিদারুণ ভয়!

কভু দেখি, মা, তোর ঘোর রণবেশ,

দেহ কৃষ্ণবর্ণ, আলুথালু কেশ,

প্রলয়ান্ধি নাচে, ত্রিনয়ন-মাঝে,

বিধ্বস্ত মহেশ পদতলে রয়।

কভু দেখি, মা, তুই কেশরি-উপরে,

দশ হাতে অস্ত্র, দৈত্য পদে প'ড়ে;

রাঙ্গা পায়ের জবা, কি কব সে শোভা!

শূন্যে দেবগণ বলে, “জয় জয়!”

কান্ত বলে, রাণি, সর্বরূপা তারা,

কন্যাস্নেহে তুমি তত্ত্বজ্ঞান-হারা;

মেলি' জ্ঞান-আঁখি, ঠিক দেখ দেখি

অনন্ত রূপিণীর রূপ বিশ্বময়!

# নগর-সংবাদ

১

(রাণীর উক্তি)

শরদাগমনে নগরবাসিজনে

প্রতিদিন এসে বসে দলে দলে;

নাই অন্য বারতা, শুধু, মা, তোর কথা,

পূর্ণ গিরি-ভবন, হর্ষ-কোলাহলে।

কেউ বা বলে, “আমার চিররুগ্ন ছেলে

মা আসছেন সংবাদে নূতন জীবন পেলে;

দিব্য কান্তি তার, কি দয়া উমার!

ব্যাম্বিমুক্ত হ’ল মায়ের নামের বলে!”

কেউ বলে, “ভাই, আমার সারা বরষ-ভ’রে

বাগানের গাছগুলি গিয়েছিল ম’রে;

মায়ের আসবার কথা বোঝে কেমন ক’রে

(তারা) সজীব হ’য়ে সাজল পল্লবে,  
ফুলে, ফলে।”

কেউ বলে, “মা এলে প’ড়ব শ্রীচরণে,

ব’ল্ব যেতে হবে এ দীনের ভবনে;

নিয়ে গিয়ে মায়, জবা দিব পায়,

দেখব মায়ের চিত্ত গলে কি না গলে!”

কুম্ভকারের দণ্ড, ছুতোরের বাটাল,

তন্তুবায়ের মাকু, চাষীর লাঙ্গল-হাল

ছোঁয়াবে চরণে, পদরজের গুণে

ব্যবসায়ে নাকি কেবল সোণা ফলে।

কান্ত বলে, সুধার চির-প্রশ্রবণ

চরণের গুণ কররে শ্রবণ;

কররে মনন, কররে কীর্তন,

অনন্ত আনন্দ পাবে করতলে।      মিশ্র বিভাস-একতালা

# নগর-সংবাদ

২

(রাণীর উক্তি)

সব রোগী উঠেছে, সব ব্যাধি টুটেছে,  
এ গিরি-নগরে রোগদুঃখ নাই;  
মা, তুই আসবি শুনে, তোর মহিমার গুণে,  
দূর হ'য়ে গেছে সমস্ত বালাই।

ঘরে ঘরে শুধু আনন্দ-উৎসব,  
সাম-গান আর চণ্ডী-পাঠের রব,  
হোম, যজ্ঞ, তপ, পূজা, স্তব, জপ,  
শুধু হর্ষা যেথা যাই!

যত মতভেদ ভুলি' পুরজন

প্রেমে কোল দিয়ে আনন্দে মগন;  
ঘুচেছে বিষাদ, বিদ্বেষ-বিবাদ,  
বিশ্ব-প্রেমে যেন সবে 'ভাই, ভাই'।

পথে পথে দধি-দুধের পসরা,  
মৃগনাভি গুলে পথে দেয়, মা, ছড়া;  
যত ধনবান্ করিতেছে দান—  
মণি, মুক্তা, যত চাই।

আমার মেয়ে তুমি, ওদের কে হও, তারা?  
ওরা কেন তোমার নামে আত্মহারা?  
কান্ত বলে, গৌরী ত্রিজগজ্জননী,  
তোমারই কেনা মা, মনে ভাব তাই?

# মহাষ্টমীর উষা

(রাণীর উক্তি)

এক দিন বুঝি গেল, মা গৌরী,  
মনে হ'তে প্রাণ কাঁপে;  
গণা দিন যায় ফুরাইয়ে, হয়!  
কোন্ বিধাতার শাপে!

বছরের কথা, তিন দিনে তোরে  
এক মুখে, উমা, বলিব কি ক'রে?  
সব কথা মোর থাকে বুকভ'রে,  
(তুই) গেলে মরি পরিতাপে।

কত কব, কত খাওয়াব-পরাব,  
স্নেহ দিয়ে তোরে কঠিন জড়াব;  
দেখিতে দেখিতে নবমীর রাতি  
মোর বুকে এসে চাপে।  
কবে কোথা সুখী তনয়ার মাতা?  
তার সুখ শুধু দুখ দিয়ে গাঁথা;  
আমারি বিশেষ, –তিন দিনে শেষ,  
কিবা নিদারুণ পাপে!

কান্ত বলে, যার চরণ-স্মরণে  
সিদ্ধি করতলে, কৈবল্য চরণে,  
তিন দিন সেই বাঁধা থাকে, তবু  
বৃথা রাণী কাঁদে, ভাবে।

# কৈলাসের দুঃখ-বর্ণন

(রাণীর উক্তি)

শুন্তে পাই, মা, হরের ঘরে  
অন্ন নাই, সে ভিক্ষা করে,  
সারা রাত শ্মশানে থাকে,  
ভস্ম মাখে, অজিন পরে।

যোগ করে, আর চাহে সিদ্ধি,  
চায় না অন্য সুখ-সমৃদ্ধি,  
হাড়ের মালা কণ্ঠে দোলায়,  
সাপ রাখে, মা, জটা ভ'রে।

ওমা, উমা, তোর কি সাজা!  
শিব নাকি সব ভূতের রাজা?  
নিত্য নাকি যোগ শিখায়, মা  
যোগিনী সাজায়ে তোরে?  
অশন-শূন্য শিবের গেহ,  
ভূষণ-শূন্য সোণার দেহ,  
(তাতে) সতীনের ঘর, কথা শুনে  
সারা বরষ অশ্রু ঝরে।

কান্ত কয়, গিরি-মহিষি!  
হর-গৌরী মেশামিষি,  
ওরা যে পুরুষ-প্রকৃতি,—  
কন্যা দিলে যোগ্য বরে।

# রাণীর অনুশোচনা

তখন ব্যাখ্যা ক'রলে নারদ কত;  
স্তোকবাক্যে লোভ বাড়িয়ে দিয়ে, ব'ল্লে,  
“জামাই হবে মনের মত!”

নারদ ব'ল্লে, “মহেশ রূপে, গুণে অতুল,  
কোনও অভাব নাই, সংসারে সব প্রতুল।”  
তখন যদি ব'ল্ত, নাই তার জাতি-কুল,—  
গিরির পায়ে ধ'রে করিতাম বিরত।

নারদ ব'ল্লে, “রাণি, সিদ্ধি তার জীবন,  
অরুণাগ্নি-শশী শিবের ত্রিনয়ন;  
তত্বকথায় হর সদা পঞ্চগনন,  
বিশ্বহিত-চিন্তা করেন নিয়ত।”

কত বিনয় ক'রে দেখতে চাইলাম কোষ্ঠী,  
নারদ হেসে ব'ল্লে, “বর দিয়েছেন ষষ্ঠী,—  
চিরজীবী হর,—অক্ষয়, অমর;  
মেয়ের শঙ্খ-সিঁদুর চির-অনাহত!”

ভাল বরে দিতে মিল্ল এসে কাল,  
নারদ ঘটক হ'য়েই ঘটালে জঞ্জাল;  
আবার ভেবে দেখি আমারি কপাল,  
(নইলে) আমি কেন তখন হ'লাম,  
মা, সম্মত!

কান্ত বলে, নারদ মিথ্যা ত বলেনি,  
যত ব'লে গেছে, কোন্ কথা ফলেনি?  
তোমার বুঝতে ভুল, পাওনি কথার মূল,  
বুঝতে পাল্লে, মা, তোর কি আনন্দ হ'ত!

মিশ্র বিভাস—একতালা

‘গিরি, গৌরী আমার এসেছিল’—সুর

# গৌরীর প্রত্যুত্তর

১

কার কাছে শুনেছ, মা গো,  
কৈলাসের দুখের কাহিনী?  
সব দেবতার মাথার মুকুট,  
ও মা, তোমার জামাই যিনি।

সে যে উচ্চ হ'তে উচ্চ,  
ভৌতিক সম্পদ করি' তুচ্ছ,  
ব্রহ্মানন্দ-রস-পানে  
বিভোর দিন-যামিনী।

যোগ না জেনে জীবরা ভোগে,  
স্থির আনন্দ আছে যোগে,  
তাই মহাযোগী সেজে নিজে,  
আমারে সাজান যোগিনী।  
নেত্রানলে ভস্ম কাম;  
বামদেব বিত্তে বাম,  
(তাই) ভৌতিক ভূষা দেন না মোরে,  
নিজে অর্জিন পরেন তিনি।

ত্রিভুগৎ পবিত্র করে,  
এমনি সতিন ঘরে,  
জটার মাঝে রাখেন ভোলা,  
পুণ্য-তোয়া মন্দাকিনী।

খাবার কষ্ট কে ব'লেছে?  
কোথায় অমন ফল ফ'লেছে?  
কান্ত বলে, কৈলাসের বেল  
দেখিস্ খেয়ে, মিষ্টি-চিনি।

এই বিশ্বের ঈশ্বর যিনি, শিক্ষা করেন তিনি,  
 চিন্তা ক'রে কিছু বোঝ, মা, এর ভাব?  
 যাঁর ইচ্ছায় সৃষ্টি হয়, কটাক্ষে প্রলয়,  
 তিনি শিক্ষা করেন, এতই তাঁর অভাব?

বিশ্ব-অধীশ্বরের শিক্ষা করা মিছে,  
 লোক-শিক্ষা-হেতু শিক্ষা করেন নিজে,  
 নরের অহঙ্কার চূর্ণ করিবার  
 এই ত' সহজ পন্থা, জীবের পরম লাভ।

তোর জামাই যান শিক্ষায়, যে যেথা যা পায়,  
 মাথায় ক'রে এনে পায়ে দিয়ে যায়;  
 এই ত' তাদের সব, পূজা, জপ, তপ;  
 কত তুষ্টি ভোলা এমনি তাঁর স্বভাব।

একমুঠো চাল দিয়ে, কৈলাসবাসি-জনে,  
 তোর জামাইয়ের বরে, পূর্ণ ধান্যে-ধনে,  
 আম দিয়ে পায় মণি, বেলে হীরার খনি,  
 বিল্ব-পত্র দিয়ে পায়, মা, সোনার চাপ।

সময় বুঝিয়া জিজ্ঞাসিলে, ভোলা  
 বলেন, “জ্ঞানীর পক্ষে যোগের পন্থা খোলা;  
 মুষ্টি-শিক্ষাদান সাধারণ বিধান।”

কান্ত বলে, দেখ, মা, দানের কি প্রভাব!

সেথা সর্বসত্তা বিদ্যমান;

অভাব কেমন ক'রে থাকবে, মা, তার ঘরে?

ভাবের রাজ্যে ভাবের আদান, আর প্রদান।

যার বিভূতির কণা পেয়ে এ সংসার

এত সুন্দর ব'লে করে অহঙ্কার,

বিশ্বের নয়নমণি, সকল শোভার খনি,

(সে যে) জ্যোতির্ময়, নিখিল-সৌন্দর্যের নিধান।

তার কেমনে, মা গো, থাকে জাতিকুল,

অজনক, অনাদি, অনন্ত, অমূল,

যার আদেশে গ্রহ চলে অহরহঃ,

তার জন্ম-কোষ্ঠী কে করে নিৰ্ম্মাণ?

ব্রহ্মা-নারদাদি সদা যুক্ত করে,

(মা তোর) ভিক্ষুক জামাতার কৃপাভিক্ষা করে,

এমন জামাই হবে, কার মিলেছে কবে?

সর্বলোকে যার সর্বোচ্চ সম্মান।

কান্ত বলে, তারা, রাণী আত্মহারা,

তোমায় পেয়ে কন্যাঙ্গানে মাতোয়ারা;

সেবে কন্যাবোধে, ওর মুক্তি কে রোধে?

(এই) অধমটাকে পায়ে দিবি কিনা স্থান?

মিশ্র বিভাস-একতালা

‘গিরি, গৌরী আমার এসেছিল’-সুর

# নাগরিকগণের মহাষ্টমীপূজার উদ্যোগ

(রাণীর উক্তি)

থাকিতে, মা, মহাষ্টমী,      শ্রীচরণ পূজিবারে,  
দলে দলে পুরবাসী      দাঁড়ায়েছে সিংহদ্বারে।

যাহার যেমন শক্তি,—  
দীনের সম্বল ভক্তি,  
ধনীরা পুজিবে, মা গো,      বহুমূল্য উপচারে।

ক'চ্ছে সবে তাড়াতাড়ি  
নিয়ে যাবে বাড়ী বাড়ী,  
গেলে, মা, অষ্টমী ছাড়ি',      দুখ পাবে তোর ব্যবহারে।

কিন্তু একটা কথা ভাবি,  
সব বাড়ী কি ক'রে যাবি?  
অত সময় কোথায় পাবি?      অষ্টমী ত' ছাড়ে ছাড়ে!  
যা হয়, উমা, কর্ গো তুরা,  
সবাইকে চাই তুষ্ট করা,  
যার বাড়ী না যাবি, গৌরী!      সেই দোষী ক'রবে আমারে।

আর দু'দিনও নাই, মা, আমার,  
সেই নবমী এল আবার,  
আঁখির আড়াল ক'ত্তে নারি,      মায়ের মন কি বুঝিস্ নারে?

এমনি ত' তোর স্বভাব, তারা!  
‘মা’ ব'ল্লে হ'স্ আত্মহারা,  
একটা জবা পায়ে দিলে,      কোলে তুলে নিস্, মা, তারে!

হোক্ না কামার, কুমোর, তাঁতি,  
আর কোনও অস্পৃশ্য জাতি,—  
কান্ত বলে, ‘মা’ ডাক শুনে,      চুপ, ক'রে মা রইতে নারে।

# নাগরিকগণের মহাষ্টমীপূজা

লক্ষ রূপে লক্ষ পূজা  
গ্রহণ করি' ঘরে ঘরে,  
লক্ষ বাঙ্গা পূর্ণ করেন  
তারিণী, অমোঘ বরে।

যিনি কাল-সীমন্তিনী,  
আজ্ঞা না করিলে তিনি,  
সাধ্য কি অষ্টমী তিথি  
এক অণুপল নড়ে

বক্ষ্যার সন্তান হবে,  
বোবা ছেলে কথা কবে,  
রোগশোক নাহি রবে  
নবাগত সম্বৎসরে।  
অন্ধ-নেত্র স্পর্শে মাতা  
খুলে দেন তার আঁখির পাতা,  
শ্রবণ-শক্তি পেল বধির  
রজঃ দিয়ে শ্রবণ-বিবরে।

কল্পলতা হ'লেন এসে  
ছোট-বড়-নির্ঝরশেষে,  
তাই তারে দেন মুক্ত করে,  
যে যা চেয়ে পায়ে ধরে।

চতুর্দিকে বাজে ঢাক,  
কত কাঁসর, ঘণ্টা, শাঁখ,  
“জয় শারদে, ব্রহ্মময়ি!”  
কি উৎসব গিরি-নগরে!

কত পায়স, পুলি, পিঠে,  
কত মঞ্জা, মেঠাই মিঠে,

দধি, দুধ, মাখন, নবনী  
ভোগ দিয়েছে ক্ষিরে, সরে।

মায়ের শুধু কৃপা-দৃষ্টি,  
ভক্তদলে মগ্ণবৃষ্টি,  
প্রসাদ পাচ্ছে কি আনন্দে,  
যার যত উদরে ধরে।

ফেরে না প্রসাদ না পেয়ে,  
তৃপ্ত হয় না প্রসাদ খেয়ে,  
খেয়ে বলে, “আরো খাবো,”  
খেয়ে কারো পেট না ভরে।

কি আনন্দ, কি উল্লাসে,  
মায়ের ভক্ত নাচে, হাসে;  
বলে, “এবার বাবা এলে,  
রাখব তোর জোর-জবরে।”  
কান্ত কয়, আনন্দময়ি  
আমি কি তোর ছেলে নই?  
(বড়) দুঃখে আছি, ঐ আনন্দের  
এক কণিকা দে, মা, মোরে।

# রাণীর আনন্দ

ও মা উমা, এ আনন্দ কোথা রাখি বল।

নগরে উঠেছে কি আনন্দ কোলাহল।

সবাই বলে “ও রাণীমা! নাইক উমার গুণের সীমা,

(ও যে) পায়ের ধূলো দিয়ে, হেসে, নাশে অমঙ্গল।

ও নয়, মা, সামান্য মেয়ে, (তুই) ধন্য হ’লি ওরে পেয়ে,

(ও) যে-ঘরে যায়, ধনে-জনে সেই ঘরই উজল!

লক্ষ লক্ষ মূর্তি ধ’রে আবির্ভূতা লক্ষ ঘরে,

(ও যে) ‘শক্তিরূপা ব্রহ্মময়ী’, ব’ল্ছে ভক্তদল!

জন্ম-অন্ধ ছিল ক’জন, ‘মা, মা,’ ব’লে ক’ল্লে ভজন,

উমা হাত বুলিয়ে নয়ন দিল ;—দেখবি যদি চল।”

ও মা গৌরী! এ কি কাণ্ড, পাগল কল্লি এ ব্রহ্মাণ্ড,

আমার শুধু চক্ষে ঠুলি, এমনি কর্ম-ফল!

না, না, উমা, দিস্নে নয়ন, ভাঙ্গিস্নে, মা, সুখের স্বপন,

তুই আদ্যাশক্তি, ভাব্তে আমার চক্ষে আসে জল।

স্বপ্ন যদি হয়, মা, তারা, করিস্নে, মা, স্বপ্ন-হারা,

আমি কন্যাহারা হ’তে নারি, (আমার) এক মেয়ে সম্বল।

কান্ত কয়, ঐ সোনার স্বপন পেলে, কে আর

চায় জাগরণ;

যদি নয়ন মুদে পাই, মা, তোরে, তাকিয়ে কিবা ফল?

# নবমীর সন্ধ্যা

১

তুমি মোর কামনা, তুমি আরাধনা,  
অন্য বাঞ্ছা নাহি করি, মা।  
তুমি পূজা-ধ্যান, তুমি চিন্তা-জ্ঞান,  
তুমি প্রাণের অধীশ্বরী, মা।

মীনের জীবন যেমন সুগভীর জলে,  
বায়ুজীবীর জীবন সমীর-মণ্ডলে,  
তেমনি তোমার মাঝে, জীবন ডুবে আছে,  
তোমাতেই বাঁচি, মরি, মা।

ফল-শূন্য তরু যেমন শোভাহীন,  
পুষ্পহীন উদ্যান যেমন বিমলিন,  
তেমনি তোমা বিনা, রাজরাণী দীনা,  
(শুধু) আসার আশে প্রাণ ধরি, মা।  
বুক ফেটে যাবে, উমা, যখন যাবি,  
আর তোরে আনব না, কভু মনে ভাবি,  
তোরা হ'য়ে হারা, এতই কষ্ট, তারা,  
তবু ঐ মায়ায় পড়ি, মা।

না মিটিল ক্ষুধা, না মিটিল তৃষা,  
ঘনাইল কাল নবমীর নিশা,  
এই দুখ-পারাবার, কিসে হব পার?  
চাহে কান্ত, পদতরী, মা।

দেখিয়া পিয়াস না মিটিতে, উমা,  
 বছরের মতন হও অদর্শন;  
 ‘মা’ ডাক শুনিয়া, না জুড়াতে হিয়া,  
 নিস্তন্ধ হয়, মা, অভাগীর ভবন।

কোলে নিয়ে আমার না জুড়াতে বুক,  
 কেড়ে নিয়ে যায়, মা, বিধাতা বিমুখ,  
 (আমার) বছরের আগুনে ঘটাহুতি দিয়ে,  
 পাষণ হ’য়ে, কর কৈলাসে গমন।

তোমার আগমনে চাঁদ হাতে পাই,  
 সুখের সাথে শঙ্কা, কখন বা হারাই!  
 (এই) আকাশ হ’তে খসি’, কখন কৈলাস-শশী  
 কৈলাসের আকাশে সমুদিত হন

কোনবার এসে আমায় করবি শঙ্কাসূন্য?  
 এত ভাগ্য কোথায়? কি ক’রেছি পুণ্য?  
 তোর আগমনানন্দে বিরহের আতঙ্ক  
 জড়িয়ে থাকে, তাইতে পাইনে আশ্বাদন।

কত কি খাওয়াব, সব ভুলে যাই,  
 বড় ব্যাকুল হিয়া, স্মৃতি ভাল নাই,  
 গৌরি! তোমায় পূজে প্রফুল্ল সবাই,  
 আমার পক্ষে বিধান অশ্রু-বরিষণ।

ঐ অস্ত গেল অকরণ রবি,  
 নবমীর শশী, পাষণের ছবি  
 ঐ দেখা যায়,—আয় কোলে আয়;  
 কান্ত বলে, মা, আর করিসনে রোদন।

# নবমী-নিশীথ

১

নবমী-নিশায় নগর নীরব,  
আনন্দ-সঙ্গীত থেমে গেছে সব,  
একটি পতাকা উড়ে না আকাশে,  
বাজে না মঙ্গল-শঙ্খ।

কঠোর-কর্তব্য-পালন-নিরত  
নবমী-শশীর কি বিষাদ-ব্রত!  
ক্লিষ্ট, মলিন, অবসন্ন কত!  
সুগভীর কি কলঙ্ক!

বিষাদ-তিমির মাথায় করিয়া,  
মৌনী তরুণণ আছে দাঁড়াইয়া,  
নাচে না ময়ূরী, মূক শ্যামা, শুক,  
নিশাকাশে উড়ে কঙ্ক।  
স্তব্ধ বিহগ গিয়েছে কুলায়,  
শুক কুসুম লুঠিছে ধূলায়,  
উষা-পরকাশে মা যাবে কৈলাসে,  
প্রাণে প্রাণে কি আতঙ্ক!

আনন্দময়ী মা নিরানন্দ ক'রে,  
যাবেন ভাবিতে গলিতাশ্রু ঝরে,  
কান্ত বলে, জাগে মায়ের প্রসঙ্গে,  
নগরবাসী-অসংখ্য।

তুই তো মা আমারি মেয়ে,  
 জন্ম নিলি এই জঠরে,  
 (তবু) মনে হয়, কেউ ন্যাসের মত  
 রেখেছে তিন দিনের তরে।

সে তিনটি দিন যেই ফুরাবে,  
 যার জিনিষ সে নিয়ে যাবে,  
 (আমি) কাকের মত, কোকিল-শিশু  
 পালন করি নিজের ঘরে।

তুই ছাড়া নাই উপলক্ষ,  
 (আর) কিছু নাই জুড়াতে বক্ষ,  
 তুই এসে ডাকবি 'মা' ব'লে,  
 এই আশে, মা, যাই না ম'রে।

চির দিনের নিয়ম আছে,  
 মেয়ে যায়, মা, স্বামীর কাছে,  
 কোন্ মা মেয়ে বেঁধে রাখে?

স্বামীর ঘর তো সবাই করে।

(কিন্তু) মা পাবে তিনটে দিন্ খালি,  
 এইটে তুই নূতন দেখালি;  
 (ও মা) এমন অটল, নিঠুর বিধান  
 নাইক কোথাও চরাচরে।

আমার মনের দুঃখে আসে কথা,  
 পাস্নে, উমা, প্রাণে ব্যথা ;  
 কান্ত বলে, রাণীর খেদে  
 জগন্মাতার অশ্রু ঝরে।

আজি নিশা অবসানে, উমা মোর কৈলাসে যাবে;  
নরনারী, পশুপাখী, তরুলতা মা হারাবে।

কে খণ্ডয়ে বিধির বিধি,  
কাল রাখিবে উমা-নিধি?  
কাল প্রাতঃকালে, কালের মত,  
মহাকাল এসে দাঁড়াবে!

সে, সকল কথা শুনতে পাবে,  
উমায় রাখা শনবে না রে,  
পাষণ গলে, শিব টলে না—  
এমনি কঠিন প্রাণ।

‘আশুতোষ’ নাম কে রেখেছে?  
এমন নিষ্ঠুর কে দেখেছে?  
শুনতে পাই, সে সংহার-কর্তা,  
তার কাছে কে দয়া পাবে?

কত না তপস্যা করি’,  
পূজেছিলাম মহেশ্বরী;  
তারি ফলে, উমা কোলে  
দিয়েছেন বিধি।

হায়রে, কেমন কপট দাতা,  
দেওয়া কেবল ছুতোনাতা;  
কান্ত বলে, এত কষ্ট!—  
মেয়ে ভবে কে আর চাবে?

# নবমী-নিশার শেষ যাম

১

নীরব অবনী, রাণীর উমা কোলে;  
একান্ত বিবশা, ভাসে নয়নজলে।

কাল হবে যে গৌরীহারা,  
কেঁদে কেঁদে হ'ল সারা,  
অভাগিনী রাণীর দুখে পাষণ যায় গ'লে।

রাণী ক্ষণে চাহে পূর্বাকাশে,  
থর থর কাঁপে ত্রাসে,  
ক্ষণে চাহে মায়াময়ীর মুখকমলে।

ক্ষণে চেপে ধরে বুকে,  
ক্ষণে চুমে ফুল্ল মুখে,  
“জাগো রে দুখিনীর বাছা, জাগো!” ব'লে।  
নয়নে পলক পড়ে,  
ক্ষীণ দেহ-লতা নড়ে,  
তাহে অশ্রু,-দৃষ্টিবাধা পলে পলে।

“কাল উড়ে যাবে প্রাণের পাখী,  
ভলে ক'রে দেখে রাখি,”  
ব'লে, রাণী কেঁদে লুঠে ধরাতলে।

প্রভাতে উদিলে রবি,  
ধুয়ে মুছে যাবে সবই,  
সুখ, শান্তি মায়ের সাথে যাবে চ'লে।

বিবশা, লুটায়ৈ ধরা,  
বলে, “জাগ, মা, দুখ-পাশরা!  
‘মা’ ব'লে ডাক্, সব ফুরাবে প্রভাত হ'লে।

রাত পোহায়, মা, নয়ন মেল,

‘মা, মা’ বল, সময় গেল;  
শুনে রাখি, শুনবো না তো, এ দুখে ম’লে।”

কান্ত বলে, সব শিয়রে,  
যে জাগ্রৎ চিরতরে,  
সেই মা ঘুমায় মায়ের বুকে, কি লীলার ছলে!

বেহাগ-আড়াঠেকা

BANGLADARSHAN.COM

আজি নিশা হয়ো না প্রভাত;  
পীড়িত মরমে আর দিও না আঘাত।

একবার বোঝ ব্যথা, একবার রাখ কথা,  
নিতান্ত শোকাক্ত, কর কৃপাদৃষ্টি-পাত।

পরিশ্রান্ত-কলেবর হে কাল! বিশ্রাম কর,  
ক্ষণমাত্র, বেশি নহে, আজিকার রাত;

আমি তো জানি হে সব, অব্যাহত চক্র তব,  
আজিকার মত, গতি মন্দ কর, নাথ!

উজল নক্ষত্ররাজি মলিন হয়ো না আজি,  
ধ্রুব হও, দীপ যথা নিষ্কম্প, নিবাত;

তোমরা পশ্চিমাকাশে, ঢলিলে তো উষা আসে,  
তোমরা মলিন হ'লে, শিরে বজ্রাঘাত!

চিরনিষ্ঠুরের ছবি, দশমী-প্রভাত-রবি!  
তুইও কি উদিত হবি? বিধির জহ্লাদ!

কান্ত বলে, রাজমহিষি! পায় না যারে যোগিঋষি,  
তিন দিন সে তোমার বুক, তবু অশ্রুপাত?

জাগ রে দাসদাসি!  
জাগ রে প্রতিবাসি!  
দেখ রে কাছে আসি'  
ফেটে যে গেল বুক।

আয় রে আয় কাছে,  
আর কি রাতি আছে!  
রাজমহিষী হ'য়ে  
দেখে যা কত সুখ!

যাহারে পাব ব'লে  
বহরে ঘুম নাই,  
যাহারে বুকে পেলে,  
নিখিল ভুলে যাই,  
যে চ'লে যাবে ভয়ে,  
মরণ আগে চাই!  
বিধাতা নেবে তারে,  
চাবে না মার মুখ।

সয়েছি কত বার,  
নূতন এই নয়,  
আমার এ সহ্য-দুখ,  
তথাপি নাহি সয়;

প্রতি শরতে যেন,  
ক্ষত নূতন হয়,  
মায়ের প্রাণ ল'য়ে,  
বিধির এ কৌতুক।

জাগ রে শুক, সারি,  
হংসি, শিখি, ধেনু!  
মাথায় নে রে তোরা,

মায়ের পদ-রেণু;

বরষ প'ড়ে আছে,

কে মরে, কেবা বাঁচে,

বিদায় নিয়ে রাখ,

চেপে মনের দুখ।

কান্ত বলে, উমা

উজল রাকা-শশী,

হাসিছে হিমগিরি—

ভবনাকাশে বসি;

চকিতে দশমীতে,

নয়ন পালটিতে,

পূর্ণগ্রাস করে

সে রাহু পঞ্চমুখ!

BANGLADARSHAN.COM

(জগদম্বার জাগরণ)

(রাণীর উক্তি)

যামিনী হইল ভোর,  
বুকের শোণিতে মোর  
লোহিত হইবে উষাকাশ গো!

আমারি জীবন ল'য়ে,  
কৈলাস সজীব হ'য়ে,  
তোমা পেয়ে, করিবে উল্লাস গো!

আমারি নয়ন-বারি  
পূরিয়া কলসী, ঝারি,  
সপল্লব, যাত্রার মঙ্গল গো;—

দুয়ারে রাখিবে সবে,  
আঙ্গিনাতে তুমি যবে,  
বাড়াইবে চরণকমল গো।

সচ্ছিদ্র মরম মম  
বরণের ডালা সম,  
তাই দিয়ে তোমারে বরিবে গো;

প্রজ্বলিত পঞ্চপ্রাণ,  
পঞ্চপ্রদীপ সমান,  
যাত্রাকালে দক্ষিণে ধরিবে গো।

আমারই রোদনধ্বনি  
শুনিবি, মা, ত্রিনয়নি!  
যাত্রার মঙ্গল-বাদ্য রূপে গো;

তৃষিত নয়ন মোর,  
পথের প্রহরী তোর,  
সাথে সাথে যাবে চুপে চুপে গো।

উমা, তুই মহামায়া,

অনাদি কালের জায়া,  
রাখ্ আজ নিশারে ধরিয়া গো;  
জননীর অনুরোধ;  
কর্ কালচক্ররোধ,  
কাঁদে কান্ত, চরণে পড়িয়া গো।

কীর্তনের সুর-কাওয়ালী

BANGLADARSHAN.COM

# দশমীর প্রভাত

(হ্রস্ব-দীর্ঘ উচ্চারণ ভেদে পাঠ্য ও গেয়)

চির-অকরণ, তরণ অরণ

দরশন দিল ধীরে;

লোহিত, নব রাগ উদিল,

পূর্ব-গগন-তীরে।

হিমগিরি-অধিরাজ-নগর

ভিত্তি উপল-ন্যস্ত;

গগনে সূর্য্য, ভবনে শম্ভু,-

কম্পিত, অতি ব্রহ্ম।

শক্তিহীন, দুর্বল হর,

শক্তি-মাত্র চাহে;

গৌরী-গত-প্রাণ নগর

মরিছে হৃদয় দাহে।

রজতাচল, শশিশেখর,

শঙ্কর, শিব, শান্ত;

কাল-সদৃশ ভাবি, ভীত

গিরি-পুরজন, ভ্রান্ত।

ক্ষণ-ভঙ্গুর-বিষয়-বিমুখ,

পরম-পুরুষ, সিদ্ধ;

বিজিতেন্দ্রিয়, আশুতোষ,

চির-অকলুষ-বিদ্ধ;

জ্যোতির্নয়, সেই অনঘ,

সর্বদেব পূজ্য;

(যেন) উদিল নগরে, চিরনির্দয়,

‘অপর দশমী-সূর্য্য!’

BANGLADARSHAN.COM

নয়ন সলিলে চরণ ধৌত  
করিল অচল-রাণী;  
কান্ত বলিছে, হর-পার্বতী  
ত্বরিতে মিলাও আনি'।

কীর্তন ভাঙ্গা সুর-জলদ একতালা

BANGLADARSHAN.COM

# শঙ্করের প্রতি মেনকা

তুমি, 'আশুতোষ' নাম যদি রাখ,  
শঙ্কর, ভিক্ষা মাগি চরণে,—  
প্রাণরূপা, হিমগিরি-ভবনে  
রেখে যাও হে, জীবন-ধনে।

'সংহার-কারী' নাম যদি,  
ওহে ত্রিপুরাস্তক, এ মিনতি,—  
শূল ধরি' তব, হানি' এ মরমে,  
গৌরীরে ল'য়ে যাও নিজ ভবনে।

'শ্মশানচারী' যদি হে তুমি,  
হিমগিরিপূর, করি' শবের ভূমি,  
তিষ্ঠ গিরিপূরে, গৌরীরে ল'য়ে সুখে,  
এ গিরি-মহিষী শব-আসনে।

'মৃত্যুঞ্জয়' যদি নাম তব,  
নিবার মরণভয়, শম্ভু, ভব!  
নাম যদি 'হর', কান্তের দুঃখ হর,  
শিব, করুণা কর, আর্তজনে।

# শঙ্করের প্রত্যুত্তর

১

মা, তুমি ভাবছ মনে,  
“এত কাঁদি, শিব টলে না;”  
চেননি নিজের মেয়ে,  
ওযে কে, তা কেউ বলে না।

তিন দিন বন্ধ ক’রে  
রাখ, মা, নিজের ঘরে,  
জগতের কাজ ভেসে যায়,  
আমার কাজের ফল ফলে না।

তোমারে ভালবেসে,  
ও হেথা থাকে এসে;  
একাকী শিব কিছু নয়,  
আমায় দিয়ে কাজ চলে না।  
ব’ল্ব কি আমার কষ্ট,  
বাড়ীঘর সবই নষ্ট,—  
শক্তিহীন হ’য়ে, আমার  
ঘরে সাঁঝের দীপ জ্বলে না।

কান্ত কয়, তত্ত্ব-কথা  
ছড়ান্ শিব যথা তথা;  
জননীর স্নেহের কাছে,  
ওসব কথায় ডাল গলে না।

ঐ দুঃখহরণ রাজাচরণযুগল,  
পাই যে মা, –কোটি-কল্প-তপস্যার ফল।

তুমিও যে কন্যা-জ্ঞানে,  
মগন উহারি ধ্যানে; –  
আমি, তোমারি সতীর্থ, নহি জামাতা কেবল।

বিশ্ব-সংসারের কাজে,  
বিহরে সংসার-মাঝে,  
শক্তিহীন বিশ্বচক্র অবশ, বিকল;

জননি, তোমার ঘরে  
স্নেহে গেছে বাঁধা প'ড়ে  
রহিতে কি পারে, এর বেশি এক পল?

আমি উপলক্ষ মাত্র,  
শুধু ওর অনুযাত্র,  
আমি ওরে নিয়ে যাই, কে বলে, মা, বল্।

অনুরোধ করা মিছে;  
না বুঝে কাঁদ, মা, নিজে,  
যাত্রার সময় গেল, মোছ আঁখি-জল।

কান্ত বলে, অদর্শনে  
পূর্ণরূপ আসে মনে,  
বিরহে তনুয়ীধরা হেরে সিদ্ধ-দল!

# রাণীর অভিমান

(শঙ্করের প্রতি)

অত বুঝিতে না চাই, বুঝে কাজ কি আমার?  
রাখিবে না-নিয়ে যাবে, বুঝিয়াছি সার।

ধরেছ কি রুদ্র-বেশ!  
পাব না যে কৃপা-লেশ,  
বুঝিয়া, বেঁধেছি বুক, দুখ নাহি আর।

মার বুকে থাকে ছেলে,  
তারে দূরে ঠেলে ফেলে,  
ছেলে নেবে, কাল ছাড়া সাধ্য আছে কার?

কালের সহজ ধর্ম,  
ছিড়িয়া পীড়িত মর্ম,  
নিয়ে যায়, পড়ে থাকে ব্যর্থ হাহকার!  
বিশ্ব-প্রয়োজনে যাবে,  
মা কেবল মিছে ভাবে;  
মাতৃ-স্নেহ লুপ্ত হবে, দৃষ্টান্তে উমার।

কান্ত বলে, একি কষ্ট,  
হোক অন্য কাজ নষ্ট;  
মায়ের স্নেহের জয় হোক না, এবার!

# যুগল-রূপ

মাণিকের চতুর্দোলে,            যুগল-মাণিক দোলে,  
ভুবনমোহন রূপ ধরিয়া;  
শূন্যে দেব দেবীগণ            করে পুষ্প বরিষণ,  
“জয় হর-গৌরী!” ধ্বনি করিয়া।

সিত-সরোরুহ-পাশে,            হেম-কমলিনী হাসে,  
(আছে) ভকতভ্রমর পদে পড়িয়া;  
রজত-কনকাচল,            করিতেছে ঝলমল,  
মন্দাকিনী-ধারা যায় ঝরিয়া।

হেরি সে মোহন ছবি,            স্থির দশমীর রবি,  
শূন্যে পাখী যেতে নারে সরিয়া;  
নিঝর হইল স্তব্ধ,            তটিনীর নাহি শব্দ,  
স্রোত আর ঢেউ গেল মরিয়া।

সমীর হইল ধীর,            তরু না দোলায় শির,  
স্পন্দহীন পশু ভূমে পড়িয়া;  
দিবপাল-বধূগণ,            নাগকন্যা অগণন,  
আসিয়াছে দিতে দৌহে বরিয়া।

চেয়ে আছে ত্রিভুবন,            ভাব-সিন্ধু-নিমগন,  
কে নিয়েছে অন্য জ্ঞান হরিয়া;  
স্পন্দহীন দেহ-প্রাণ            রূপসুধা করে পান,  
তৃষিত নয়ন-মন ভরিয়া।

ভুলিয়া মরম-দুখ,            রাণী হেরে দৌহা-মুখ,  
গলদশ্রু গণ্ডে পড়ে গড়িয়া;  
ও মূর্তি-মকরন্দ,            পান না করিলে অন্ধ,  
কেমনে যাইবে কান্ত তরিয়া?

# রাণীর প্রার্থনা

আমি কেমনে পাশরে থাকি;  
তোরা কি দেখালি, উমা, মধুর মূর্তি,  
ফিরিতে না চাহে আঁখি!

নিখিল ভুবন মুগ্ধ হইয়া,  
চরণে বিকাতে চায়;  
পায়ে ধরি, উমা, সঙ্গে করিয়া,  
নিয়ে যা অভাগী মায়।

তুই চ'লে গেলে, এ ভবনে আর  
কারে দেখে প্রাণ রবে?  
কাঁদিয়া কাঁদিয়া মরিবার তরে,  
কেন ফেলে যাবি তবে?

গিরিরাজ-পায় লইয়া বিদায়,  
এখনি আসিব আমি;  
অনুমতি কর, বিপুল নগর  
হবে তোর অনুগামী।

বেশি দিন আর, নাই, মা, আমার,  
তোমা ছাড়া হ'তে নারি;  
কাঁদিয়া কাঁদিয়া, আয়ু শেষ হ'ল,  
আর না কাঁদিতে পারি।

কৈলাসের সেই আনন্দ-বাজারে,  
সাথে নে, মা, দুখিনীরে;  
ও মুখ দেখিব, 'মা' ডাক শুনিব,  
আসিতে চাব না ফিরে।

কামনা-সাগর-তীরে ব'সে শুধু  
কাঁদে, আর বেলা নাই;—

BANGLADARSHAN.COM

অনুমতি দে, মা, কান্ত অধমে  
সাথে ক'রে নিয়ে যাই।

কীর্তন ভাঙ্গা সুর-জলদ একতালা

BANGLADARSHAN.COM

# যাত্রা

সবে সাজাইল আঙ্গিনায়,  
ঋষি-নির্ঝাঁপিত যাত্রার মঙ্গল,  
শুক্ল ধান্য, আর নব দুর্বাদল,  
দীপ সুশোভন, রজত, কাঞ্চন,  
পুষ্প, দধি, মধু তায়।

গঙ্গোদকপূর্ণ হেম-কুম্ভ শত,  
পল্লবে, চন্দনে, সাজিয়াছে কত,  
দিব্য স্ত্রী, ব্রাহ্মণ; কেতু অগণন  
উড়িছে দক্ষিণা বায়।

দ্বারের বাহিরে শত ধেনু, বৎস,  
সিন্দূর-প্রলিপ্ত নানাজাতি মৎস্য,  
বৃষ, অশ্ব, করী, রাখে শ্রেণী করি,  
তারাও নিষ্পন্দ-প্রায়।

বন্দী, চারণেরা রাজার ইঙ্গিতে,  
কাঁদাইল সবে, বিদায়-সঙ্গীতে,  
কি করুণ বাদ্য ঘোষিল নগরে—  
“জননী কৈলাসে যায়!”

জগদ্ধাত্রী, যিনি পালেন অবনী,  
রাণী দেন তাঁর বদনে নবনী,  
নয়নে কজ্জল, ললাটে সিন্দূর,  
যাবক, রাতুল পায়।

“ভবের পথে হবে জীবের মঙ্গল,”  
বলে, যে মা দেন পথের সম্বল,  
তাঁরি পথের সম্বল রাণী দিলেন বেঁধে,  
মায়ের লীলা বোঝা দায়।

BANGLADARSHAN.COM

করেন আশীর্বাদ, নয়নের জলে,  
“চিরজীবী হোক মৃতুঞ্জয়,” বলে,  
বাম-পদধূলি, দেন মাথে তুলি’,  
কান্ত সাথে যেতে চায়।

আলেয়া-একতালা

BANGLADARSHAN.COM

# যাত্রা

জগত-কুশল-রূপ,                      রজত-সচল-স্তুপ,  
আগে যান স্বয়ম্ভু শঙ্কর;  
পশ্চাতে নন্দীর কোলে,              উমার গণেশ দোলে,  
দেবশিশু পরম সুন্দর।

কেশরি-উপরে বসি',                  মাঝে যান উমাশশী,  
রূপে ঝল মল পথ-ঘাট;  
ভেঙ্গে গিরিপূর হ'তে                  লাগি' লাগি' পথে পথে,  
কৈলাসে চলিল চাঁদের হাট।

হেরি' মনে হয় হেন,                  মধ্যাহ্ন-মার্ভণ্ড যেন,  
অকস্মাৎ শূন্যে মিলাইল;

হিমালয়-জনপদ,                      শৃঙ্গ-উৎস-নদী-নদ,  
আচম্বিতে তিমিরে ডুবিল।

শারদ-পূর্ণিমা-নিশা;-                  লক্ষ চকোরের তৃষা  
মিটায়, হাসিতেছিল রাকা;

জলদ ভীষণকায়                      ধাইল রাহুর প্রায়,  
ফুল্ল শশী প'ড়ে গেল ঢাকা।

বিশাল শালুলী বৃক্ষ,                  আলো করি' অন্তরীক্ষ,  
লক্ষ লক্ষ সুরঞ্জিত ফুলে,-  
যেন রে দাঁড়ায়ে ছিল,                  সে শোভা কে হ'রে নিল,  
মুহূর্ত্তে সমস্ত ফুল তুলে'।

স্বর্গের সুষমা-সদা,                  কোটি কোটি ফুল্ল পদা  
ফুটেছিল সরোবর জলে;

অকস্মাৎ প্রভঞ্জন                      ক'রে নিল উৎপাটন,  
ছিন্ন বৃন্ত প'ড়ে র'ল তলে।

হিমালয় শূন্যপ্রাণ,                      উৎসব-আনন্দ-গান  
অকস্মাৎ কে লইল কেড়ে?

কান্ত বলে, পুরী স্তব্ধ,            নাহি স্পন্দ, নাহি শব্দ,  
রাজলক্ষ্মী গেল রাজ্য ছেড়ে।

কীর্তন ভাঙ্গা সুর-কাওয়ালী

BANGLADARSHAN.COM

# রাণীর খেদ

(দশমী)

(উমা) ছেড়ে গেছে অভাগিনী মায়;

(আমার) রোদনের অতীত দুখ, কে বুঝিবে হয়!

(কত) কেঁদেছি চরণে ধরে, নিল না তো সঙ্গে ক'রে;

উমাহীন ভবনে কি ফিরে আসা যায়?

বুঝি গো সবে না বুকে, মরিব উমার দুখে,

অথবা হইয়া র'ব পাগলিনী-প্রায়!

নবমী-নিশীথ হ'তে ভেসেছিল অশ্রুস্রোতে,

(আজ) গলা ধরে কেঁদে, উমা লইল বিদায়।

সজল-বিষণ্ন-মুখে, বলে, “মা গো, তোর দুখে

বড় ব্যথা পাই মর্মে, বড় কান্না পায়;

(তুই) বেঁধেছিস্ কি মায়াডোরে, ভুলিতে না পারি তোরে,

(তবু) না গেলে নয়, তাই যেতে হয়, প্রাণ কি যেতে চায়?

(আমি) আবার আসবো, কাঁদিস্ নে মা, আশায় এ

বুক বাঁধিস্ রে মা!”

ব'লে, উমা নিজ আঁচলে, মোর নয়ন মুছায়।

কি স্নিগ্ধ-করণা-মাখা মুখ নিষ্কলঙ্ক রাকা,

এখনো নয়ন-আগে ভাসিয়া বেড়ায়।

মানস চক্ষু পাই দেখিতে, তাতে তৃপ্তি হয় না চিতে,

(আমি) নয়ন, শ্রুতি, পরশ দিয়ে, পেতে চাই উমায়।

আকুল হ'য়ে কান্ত ভাবে, কেমন ক'রে বরষ যাবে?

রাণী আর কি শরণ পাবে, উমার ভরসায়?

# রাণীর খেদ

(দশমী)

যদি কেঁদে কেঁদে এমন হয়, তারা,  
আমি নয়ন-তারা-হারা হ'য়ে  
হারাই যদি নয়ন-তারা;—

(এ তিন) দিনের দেখাও ফুরিয়ে যাবে,  
অন্ধ মা তোর, হাত বাড়াবে,  
তখন, যেথা থাকিস্ আসিস্ কোলে,  
(নইলে) ছুটবে বুকে রক্তধারা।

(আমি) তোর বিরহের দুখ-পাথারে,  
ম'লাম ডুবে দেখলি না রে!  
কান্ত বলে, প্রবোধ মিছে,  
কই পাথারের কূল-কিনারা?

BANGLADARSHAN.COM

# রাণীর খেদ

(একাদশীর প্রভাত)

কাল, এখনো আমারি কোলে ছিল,  
‘মা’ ব’লে, কেঁদে, কি ব’লেছিল।

আমার, আকুল রোদন, গভীর বেদন  
দেখে দয়াময়ী গ’লেছিল।

উমা, কাঁদিয়া বিবশা ‘মা’ ব’লে গো,  
অশ্রু মিশিল কাজলে গো,  
আমি, মুছেচি দুকূল-আঁচলে গো।  
আর, বুঝি বাঁচিব না, শরত পাব না,  
ভেবে মা আমার ট’লেছিল।

আমার, মায়ের গায়ের গন্ধ গো,  
এই, আঁচলে রয়েছে বন্ধ গো,  
যেন, মন্দার-মকরন্দ গো;  
ঐ, হলুদ-কাজল-লিপ্ত আঁচল,  
(উড়ে) মার সাথে চ’লেছিল।

আমার, বরষের স্মৃতি, দুখহরা,  
চীর-খণ্ড ওই প’ড়ে ধরা,  
হর-গৌরী-পদ-রেণু-ভরা;—  
কান্ত বলে, ঐ কনকের পীঠ  
যুগলের পদ-তলে ছিল!

# রাণীর খেদ

(একাদশীর সন্ধ্যা)

- (ঐ) মা-হারা হরিণ-শিশু চেয়ে আছে পথপানে,  
অশ্রু ঝরিছে শুধু, কাতর দু'নয়ানে।
- (ঐ) হংস-সারস-কুল, মলিন মুখে,  
বুঝাইতে নারে কি যে বেদনা বুকে,  
কি সোহাগে খেতে দিত, অন্ন নয়, সে অমৃত,  
সে মা কোথা চ'লে গেছে, বড় ব্যথা দিয়ে প্রাণে।
- (ঐ) শুক, শ্যামা এ ক'দিন “মা”, “মা”, ব'লে,  
প'ড়েছে উমার বুকে, সোহাগে গ'লে ;  
চ'লে গেছে নয়ন-তারা, আহার ছেড়েচে তারা,
- (যেন) জিজ্ঞাসে নীরব ভাষে, “মা গিয়েছে কোন্ খানে?”  
নয়নের মণি, সে যে সকলের প্রাণ,  
চ'লে গেছে, প'ড়ে আছে নীরব শ্মশান;-  
কেমনে পাইব আর, মা আমার, মা আমার!  
কান্ত বলে, প্রাণ দে মা, পুনঃ দরশন-দানে।

মিশ্র খান্নাজ-কাওয়ালী

॥সমাপ্ত॥